



23. juli 2012

Inatsisartut Suleriaasianni § 37 naapertorlugu matumuuna imaattumik Naalakkersuisunut apeqquteqarpunga:

1. **Namminersorlutik Oqartussat kulturimut suliniutinut tapiissutaasa (kulturmidler) agguaneqartarneranut suleriutsimik allaanerusumik Naalakkersuisut suliniuteqarpat, allanngortitsinissarlu siunertaappat qaqugu tamanna naatsorsuutigineqassava?**
2. **Ukioq manna kulturikkut suliniutinut Namminersorlutik oqartussat tapiiffigisimasaat qassiuppat?**
  - a. **Qinnuteqarsimasunillu itigartitaasoqarsimassappat itigartitaasut qassiuppat?**
  - b. **Itigartitsinermut suut tunngaviusimappat?**
  - c. **Akuerisaasimasut suut tunngavigalugit tapiiffigineqarsimappat?**
3. **Nunatsinni filmiliortarnermut attuumassuteqartunut Namminersorlutik Oqartussat suliniutinut tapiissutaat ukioq manna qanoq inissisimappat?**
  - a. **Filimiliorniarlutik qinnuteqartut qassiuppat, suminggaanneerpallu?**
  - b. **Qassit itigartitinneqarsimappat, itigartitsisoqarsimappallu suut tunngaviusimappat?**
  - c. **Akuerisaasimasut suut tunngavigalugit tapiiffigineqarpat?**
4. **Naalakkersuisut isumaqarpat siunissami kulturikkut suliniutinut Namminersorlutik Oqartussat tapiissutigisartagaat amerlanerusariaqartut?**
5. **Eqqumiitsuliornikkut Pinngorartitsisut Ingerlatsisullu kulturikkut siuliuteqartunut tapiissutaasartut agguaneqartarnerat qaqugu akisussaaf-figilissavaat?**

(Inatsisartunut ilaasortaq Jane Petersen, Inuit Ataqatigiit)

**Tuungavilersuut:**

Ilisimavarput Nunatsinni kulturikkut piorsaanermi eqeersimaartut ikiliartunngitsut, illuatungaanilli qujanartumik amerliartortut. Taamaattumillu piviusorsioortuuvoq nunatsinni kulturikkut suliniartut pisortanit tapersersorneqarnissaat.

Ilisimavara siunertarineqartoq nunatsinni Eqqumiitsuliornermik Pinngorartitsisut Ingerlatsisullu kattuffeqalernerata kinguneratigut Namminersorlutik Oqartussat kulturikkut suliniuteqartunut tapiissutigisartagaat ilisimasaqartunit, tassa eqqumiitsuliortunit kattuffimillu ingerlatisunit, agguanneqartalissasut. Tassa tapiissutit toqqaannartumik kultureqarnermut Naalakkersuisoqarfimmit agguanneqartarunnaarlugit. Taamaattullu siunertap qaqagu piviusungnornissaa naalakkersuisunut apeqqutigaara.

Naalakkersuikkut siunniunneqarpat nunatsinni kulturikkut ineriartorneq annertusarneqassasoq, taava soorunami pilersaaruteqartoqarnera pissusissamisoorpoq. Taamaattumik kulturikkut suliniartut inuiaqatigiit aningaasaataannit siunissami tapersersoneqarnissaat qanoq isikkoqassanersoq apeqqutigaara.

Apeqqutimma ilaat aallaaveqarput qinnuteqarsimasunut paasissutissat annertunerusumik pissarsiarisinnaasimannnginnakkit. Soorlu qassit tapiissutininut qinnuteqaateqarsimanersut, qassillu tapiissutininut akuerisaasimanersut il. il.